

UTUSAN MALAYSIA

DATE: 02/09/2007

Annuar kecewa Nik Aziz tidak hadir sambutan merdeka

UM- 2/9/2007

KOTA BHARU 1 Sept. - UMNO Kelantan kecewa berikutan ketiadaan pemimpin utama negeri ini yang hadir pada perbarisan sempena sambutan ulang tahun kemerdekaan negara ke-50 yang diadakan di perkarangan Stadium Sultan Muhammad ke-IV di sini, semalam.

Pengerusi Badan Perhubungan UMNO Negeri, Datuk Seri Annuar Musa berkata, beliau juga kecewa apabila kerajaan negeri tidak menjemput wakil rakyat pembangkang untuk menghadiri upacara sambutan jubli emas kemerdekaan negara.

"Bila saya baca ulasan akhbar hari ini dari negeri ke negeri, semua Menteri Besar hadir pada acara tersebut tetapi di Kelantan kita merasa kecewa apabila

Menteri Besar tidak hadir.

"Saya tidak tahu apa sebab tidak hadir, mungkin Menteri Besar keuzuran. Yang kedua wakil rakyat (Barisan Nasional) tidak jemput untuk hadir pada upacara itu, jadi kita buat sendiri sambutan diambang merdeka," katanya.

Beliau berkata demikian ketika ditemui pemberita pada Jogathon Amal Kok Lanas dan Pelancaran Bulan Kecergasan peringkat negeri di Dataran Warisan KADA, Kok Lanas dekat sini hari ini.

Jogathon yang diadakan untuk mengumpul dana bagi membantu pelajar miskin dan cacat itu disertai lebih 1,000 pelajar sekolah dari seluruh negeri.

Perbarisan sempena sambutan ulang tahun kemerdekaan ne-

gara ke-50 yang diadakan di perkarangan Stadium Sultan Muhammad ke-IV semalam hanya di hadiri oleh Pengerusi Jawatankuasa Pentadbiran Awam, Perancang Ekonomi, Kewangan dan Pembangunan Masyarakat, Datuk Husam Musa bersama barisan anggota exco yang lain.

Dalam pada itu, Annuar menyelar tindakan pihak tertentu yang mempertikaikan Badan Perhubungan UMNO Negeri Kelantan mengadakan Sambutan Ambang Merdeka di Dataran KADA Kok Lanas malam kelmarin.

"Sambutan di ambang merdeka bukan diadakan dua tempat sahaja di negeri ini tetapi di 13 kawasan majlis daerah.

Sementara itu, Setiausaha Politik Menteri Besar Kelantan,

Annual Bakri Haron berkata, Nik Abdul Aziz tidak hadir pada sambutan kemerdekaan negara peringkat negeri semalam kerana ingin memberi peluang kepada pemimpin muda merasai suasana berada di atas pentas utama semasa sambutan itu.

"Ada masa beliau memberikan kuasa kepada pemimpin pelapis supaya mereka dapat belajar bukan sahaja dalam pengurusan tetapi bagaimana rasanya berada di atas pentas semasa sambutan kemerdekaan.

"Saya juga ingin menegaskan 'Tok Guru' (Datuk Nik Abdul Aziz) berada dalam keadaan sihat malah pada malam ini beliau berada di Terengganu untuk menghadiri satu majlis parti," katanya.